

L'é temp de Carnascèr ence per chi fenc dal ciapel da fiores

Claudia Conta ne disc coche, aldò de la tradizion, cogn se regoler i conscric, ic e eles

Tradizions - Me sente de scriver chest articol percheche chela di conscric l'è na tradizion che carenassa no la jisse ju. Aboncont da dotrei egn in cà ge vèrde ai cèr di conscric che va in defilèda e me vegn demò aric. El fosc amò zachei che ge conta ai conscric fascegn aldidanché che che vel dir fèr i conscric? A mi me sà che i jogn i la tol, chesta tradizion, desche na bona ocajon per esser autorisè a se fèr na gran bala e bon. Me sà gran burt cognèr i dir, ma coscità la è. Te na USC che no l'è trop temp è scrit te mia rubrica in cont al guant di conscric e in cont a sia tradizion.

I conscric e chel che i èssa da fèr

"Fèr i conscric" se scomenza a l'èr canche se compiesc 18 egn, ma se "è conscrit o conscrita" del töl o de la tēla sessaben duta la vita e coscità se se troa a fèr na cena, n viac insem, na raia sa mont, un an de più e un an demanco, e i conscric èssa ence da jir a sepultura de n conscrit. Chest "esser



Na jona conscrita ti egn 30.

conscric de zachei" compagna na persona duta la vita e l'è bel de la tradizion l'è n "fèr grop", l'è n se troer. I omin, zacan demò ic, i metea sù l'ciapel da conscrit canche i vegnia declaré "abili", chi che no vegnia declaré "abili", i vegnia mingol grigné fora e ge vegnia tacà na popa de peza sun portela del colet.

De desdot egn, l'era chel per ic i moment de fèr n vèrech inant te la

sozietà, de esser declaré omin, de poder jir a touses e de poder balèr, inchecondi se dijessa jir mingol a fèmenes, ence jir te ostarìa, sessaben. Vel dir per ic no esser più bec, aer responsabilità!

Chest vèrech per eles, per la touses, l'scomenza dant. Ià de seides egn la bezes è conscidrèdes touses e les se tira ite l'camejot co la treces da grana. Ma de chest sin rejonon te n auter articol.

Chest poder "jir e fèr" per n conscrit no vel seguramenter dir che a fèr i conscric ge vel beiver da no più intener nia e bon e bèsta.

I conscric i èssa da se inignèr n guant "superlusso", e i èssa da jir a sonèr e balèr i èssa da portèr bandieres da la gran festes e sègnes, i èssa da tor pèrt a la nozes e fèr de picola matitèdes, e perche pa no, ence fèr baschia e/o vèlch rima ai sposc. Ai 27 de dizember, di di fenc, l'è i conscric che va stroz, sona e bala.

L'ciapel da conscrit

Zacan l'era la fèmenes che ge l'fajea a ic, inchecondi peisse che ence ic posse fèr sia pèrt. I jissa fat pien de beloc picui fiores de papier, de bela cordeles de seida e la mesacoudes o piumes del gial da mont. La cordeles l'è n simbol per la fèmenes che l'conscric cognose, ajache les fossa cheles de gramièl da fascèna. Chest vel dir che desche la piumes del gial da mont ence la cordeles l'è n simbol de virilità! N ciapel coscità l'è cèr, l'costa temp e moneida, ma l'è vèlch da bel e prezios, n vèrech de la vita de ogne tous... e paassa la speisa se tor del temp e l'fèr delvers.

E la fèmenes conscrites?

Ti egn '20 e '30 del secul passà,



N veie ciapel da conscrit bel forn sù.

canche l'feminism ge èa zacan fat vadagnèr stima e derit de stima a la eles de nesc tempes modern, ence la fascènes se èa pissà de se fidèr se meter n ciapel da conscrit(a). Les èa pa ben rejon, ence eles volea sessaben fèr festa per sie desdot egn. Aboncont fèr i conscric col ciapel da mesacoudes e la cordeles l'è per significat na usanza per fenc e no per touses. Lògica che se pel la adatèr, ma se dighe la adatèr, no copièr senza saer cheche se se tira ite o se à sul cef.

Canche veide la conscrites co la cordeles sul ciapel me vegn da valèr.

Con dut l' respet e l'amor per l'feminism, e dighe dassen, l'ciapel da conscrites amàncol no l'èssa da aer la cordeles e la piumes, pardiè! Cara mia conscrites, cara fascènes domanave chel che vel dir cheche ve tirède ite o ve metede sul cef. Te voscia tradizion DUT CANT l'è na valuta e n significat.

L'gramièl da la falda no l' disc nia sui conscric

L'gramièl brun, dit ence "chel da la falda" no se canche l'è vegnù de moda per i conscric, ma no l'è vèlch da tipich per ic, no sin pèrta pa de eles. Chela sort de gramièl i li metea a vegnir da mont jù (soral d'ut bienc) i gùceres, n ost te ostarìa, i caneveres a na noza... e duc i omin te paisc...



sessaben chi che volea/vel.

L'cèr di conscric in defilèda da la Gran Festa da d'Istà

Da n trat in cà, coche dijee dant, l'cèr di conscric l'viventea la defilèda e chest l' dighe dassen. Conscric e conscrites su n cèr regolé coche i conscric no va regolé, con ciapie e cordeles e mesacoudes ence la conscrites, e min despès l' dir, più da ua che auter. Volesse recorder che i conscric coscità in defilèda i no à n gran perché. Se se volessa moscèr l'guant, ge volessa fèr na defilèda de conscric e conscrites regolèdes coche carenea, se invèze se volessa moscèr chel che n grop de conscric à da fèr, dijessa che na bela stua sun n cèr e dotrei conscric che sona e de etres che bala con dotrei dintornvia n desch che inigna n ciapel fossa belebon!

Aboncont conscric e conscrites, recordave che carnascèr l'è temp de conscric de bai e matitèdes ence inchecondi e chest ben che l'fèsc pèrt de noscia tradizion!

Claudia Conta



Conscrit d'alididanché en defilèda sul cèr.